

Na osnovu člana 30. stav (1) tačke b) i stav (2) i člana 32. stav (2) Zakona o platama i naknadama u institucijama Bosne i Hercegovine ("Službeni glasnik BiH", br. 50/08, 35/09 i 75/09), člana 50. stav 4. tačke b) i stav 6. Zakona o radu u institucijama Bosne i Hercegovine ("Službeni glasnik BiH", br. 26/04, 7/05, 48/05 i 60/10) i člana 17. Zakona o Savjetu ministara Bosne i Hercegovine ("Službeni glasnik BiH", br. 30/03, 42/03, 81/06, 76/07, 81/07, 94/07 i 24/08), Savjet ministara Bosne i Hercegovine na 5. sjednici, održanoj 18. aprila 2012. godine, donio je

## **ODLUKU**

### **O VISINI NOVČANE NAKNADE ZAPOSLENIM U INSTITUCIJAMA BOSNE I HERCEGOVINE ZA ISHRANU TOKOM RADA**

Neslužbeni prečišćeni tekst ("Službeni glasnik BiH", br. 42/12 i 28/19)

#### **Član 1**

##### **(Predmet Odluke)**

Ovom Odlukom utvrđuje se visina novčane naknade zaposlenim u institucijama Bosne i Hercegovine na ime ishrane tokom rada u skladu sa članom 32. stav (2) Zakona o platama i naknadama u institucijama Bosne i Hercegovine.

#### **Član 2**

##### **(Visina naknade)**

(1) Zaposlenom pripada pravo na novčanu naknadu na ime ishrane tokom rada od 8,00 KM za svaki dan proveden na radu.

(2) Izuzetno od stava (1) ovog člana, članovima Predsjedništva Bosne i Hercegovine, poslanicima i delegatima u Parlamentarnoj skupštini Bosne i Hercegovine, predsjedavajućem Savjeta ministara Bosne i Hercegovine, ministrima i zamjenicima ministara, rukovodiocima i zamjenicima rukovodioca institucija Bosne i Hercegovine pripada pravo na novčanu naknadu na ime ishrane tokom rada od 6,00 KM za svaki dan proveden na radu.

(3) Obračun naknade na ime ishrane tokom rada vrši se unazad mjesečno na osnovu evidencije o prisustvu, a isplata naknade uz isplatu plate za isti mjesec.

### Član 3

#### (Izuzeci u primjeni)

Zaposlenom ne pripada pravo na novčanu naknadu na ime ishrane tokom rada za dane provedene na službenom putu, godišnjem odmoru i bilo kojem drugom odsustvu s rada koje zaposleni koristi u skladu sa zakonom.

### Član 4

#### (Prestanak važenja)

Danom početka primjene ove Odluke prestaje da važi Odluka o visini novčane naknade zaposlenim u institucijama Bosne i Hercegovine za ishranu tokom rada ("Službeni glasnik BiH", broj 58/09).

### Član 5

#### (Institucije odgovorne za provođenje Odluke)

Za realizaciju ove Odluke zadužuju se institucije Bosne i Hercegovine i Ministarstvo finansija i trezora.

### Član 6

#### (Stupanje na snagu)

Ova Odluka stupa na snagu danom stupanja na snagu Zakona o Budžetu institucija Bosne i Hercegovine i međunarodnih obaveza Bosne i Hercegovine za 2012. godinu i objavljuje se u "Službenom glasniku BiH", a primjenjivaće se od 01.05.2012. godine.

#### ***Samostalni član Odluke o izmjeni***

#### ***Odluke o visini novčane naknade zaposlenim u institucijama Bosne i Hercegovine za ishranu tokom rada***

*("Sl. glasnik BiH", br. 28/2019)*

### Član 2

(1) Ova Odluka stupa na snagu narednog dana od dana objavljivanja u "Službenom glasniku BiH", a primjenjivaće se od 01.07.2019. godine, pod uslovom da je Zakon o Budžetu institucija Bosne i Hercegovine i međunarodnih obaveza Bosne i Hercegovine za 2019. godinu stupio na snagu do 01.07.2019. godine.

(2) Izuzetno od stava (1) ovog člana, ukoliko je Zakon o Budžetu institucija Bosne i Hercegovine i međunarodnih obaveza Bosne i Hercegovine za 2019. godinu stupio na snagu poslije 01.07.2019. godine, odredbe ove odluke primjenjuju se narednog mjeseca od dana stupanja na snagu Zakona o Budžetu institucija Bosne i Hercegovine i međunarodnih obaveza Bosne i Hercegovine za 2019. godinu.